

李濂醫史二

醫史卷之四

隋書二人

許智藏傳
許澄

浚
儀
李
濂
輯



許智藏高陽人也祖道幼嘗以母疾遂覽醫方因而
究極世號名醫戒其諸子曰為人子者嘗膳之藥不
知方術豈謂孝乎由是世相傳授仕梁官至員外散
騎侍郎父景武陵王諮議參軍智藏少以醫術自達
仕陳為散騎侍郎及陳滅高祖以為員外散騎侍郎
使詣揚州會秦孝王俊有疾上馳召之後夜中夢其
亡妃崔氏泣曰本來相迎比聞許智藏將至其人若
司官必相陪為之奈何明夜浚又夢崔氏曰妾得計

矣當入靈府中以避之及智藏至為俊診脉曰疾已
入心即當發癰不可救也果如言俊數日而薨上奇
其妙賚物百段場帝即位智藏時致仕于家帝每有
所苦輒令中使就詢訪或以輦迎入殿扶登御牀智
藏為方奏之用無不效年八十卒於家宗人許澄亦
以醫術顯父爽仕梁太常丞中軍長史隨柳仲禮入
長安與姚僧垣齊名拜上儀同三司澄有學識傳父
業尤盡其妙歷尚藥典御諫議大夫封賀州縣伯父
子俱以藝術名重於周隋二代史失事故附見云

舊唐書九人

孫思邈傳

孫思邈京兆華原人也七歲就學日誦千餘言弱冠

善談莊老及百家之說兼好釋典洛州總管獨孤信見而歎曰此聖童也但恨其器大適小難為用也周宣帝時思邈以王室多故乃隱居太白山隋文帝輔政徵為國子博士稱疾不起嘗謂所親曰過五十年當有聖人出吾方助之以濟人及太宗即位召詣京師差其容色甚少謂曰故知有道者誠可尊重羨門廣成豈虛言哉將授以爵位固辭不受顯慶四年高宗召見拜諫議大夫又固辭不受上元元年辭疾請歸特賜良馬及鄱陽公主邑司以居焉當時知名之士宋令文孟詵盧照鄰等執師資之禮以事之思邈嘗從幸九成宮照鄰留在其它時庭前有病梨樹照

舍父老云是鄱陽公主邑司昔公主未嫁而卒故其
邑廢時有孫思邈處士居之邈道合古今學彈數術
高談正一則古之蒙莊子深入不二則今之維摩詰
耳其推步甲乙度量乾坤則洛下閎安期先生之傳
也照鄰有惡疾醫所不能愈乃問思邈名醫愈疾其
道何如思邈曰吾聞善言天者必質之於人善言人
者亦本之於天天有四時五行寒暑迭代其轉運也
和而為雨怒而為風凝而為霜雪張而為虹蜺此天
地之常數也人有四支五藏一覺一寢呼吸吐納精
氣往來流而為榮衛彰而為氣色發而為音聲此人
之常數也陽用其形陰用其精天人之所同也及其
失也蒸則主熱否則主寒結而為瘤贅陷而為癰疽

奔而為喘乏竭而為焦枯診發乎面變動乎形推此
以及天地亦如之故五緯盈縮星辰錯行日月薄蝕
索彗飛流此天地之危診也寒暑不時天地之蒸否
也石立土踊天地之瘤贅也山崩土陷天地之癰疽
也奔風暴雨天地之喘乏也川瀆竭涸天地之焦枯
也良醫導之以藥石救之以鍼劑聖人和之以至德
輔之以人事故形體有可愈之疾天地有可消之災
又曰膽欲大而心欲小智欲圓而行欲方詩曰如臨
深淵如履薄冰謂小心也趙趙武夫公侯干城謂大
膽也不為利回不為義疚行之方也見機而作不俟
終日智之圓也思邈自云開皇辛酉歲生至今年九
十矣狗之鄉里或云數百歲人話調濟間事歷歷

如眼見以此參之不啻百歲人矣然猶視聽不衰神
采甚茂可謂古之聰明博達不死者也初魏徵等受
詔脩齊梁陳周隋五代史恐有遺漏屢訪之思邈口
以傳授有如目觀東臺侍郎孫處約將其五子佺儼
俊佑佺以謁思邈思邈曰俊當先貴佑當晚達佺最
名重禍在執兵後皆如其言太子詹事盧齊卿童幼
時請問人倫之事思邈曰汝後五十年位登方伯吾
孫當為屬吏可自保也後齊卿為徐州刺史思邈孫
溥果為徐州蕭縣丞思邈初謂齊卿之時溥猶未生
而預知其事凡諸異迹多此類也永淳元年卒遺令
薄葬下藏冥器祭祀無牲牢經月餘顏貌不改舉屍
就木猶若空衣時人異之自注老子莊子撰千金一

三十卷行於代又撰福祿論三卷攝生真錄及枕中素書會三教論各一卷子行天授中為鳳閣侍郎

按新唐書思邈乃在隱逸傳蓋重其人不以方技目之也中間紀盧照隣問養性之要荅曰天有盈虛人有屯危不自慎不能濟也故養性必先知自慎也慎以畏為本故士無畏則簡仁義農無畏則墮稼穡工無畏則慢規矩商無畏則貨不殖子無畏則忘孝父無畏則廢慈臣無畏則勲不立君無畏則亂不治是以太上畏道其次畏天其次畏物其次畏人其次畏身憂於身者不拘於人畏於己者不制於彼慎於小者不懼於大戒於近者不

侮於遠知此則人事畢矣此皆舊唐書所遺者故附錄于傳後實養性脩身之要延年却病之方也

許胤宗傳

許胤宗常州義興人也初事陳為新蔡王外兵參軍時柳太后病風不言名醫治皆不愈脉益沉而喑胤宗曰口不可下藥宜以湯氣薰之令藥入腠理周洽即差乃造黃耆防風湯數十斛置於牀下氣如煙霧其夜便得語由是超拜義興太守陳亡入隋歷尚藥奉御武德初累授散騎侍郎時關中多骨蒸病得之必死遞相連染諸醫無能療者胤宗每療無不愈或謂曰公醫術若神何不著書以貽將來胤宗曰醫者

意也在人思慮又脉候幽微苦其難別意之所解口
莫能宣且古之名手惟是別脉脉既精別然後識病
夫病之於藥有正相當者惟須單用一味直攻彼病
藥力既純病即立愈令人不能別脉莫識病源以情
臆度多安藥味譬之於獵未知兔所多發人馬空地
遮圍或冀一人偶然逢也如此療病不亦疎乎假令
一藥偶然當病復共他味相和君臣相制氣勢不行
所以難差諒由於此脉之深趣既不可言虛設經方
豈加於舊吾思之久矣故不能著述耳年九十餘卒

甄權傳

弟立言

甄權許州扶溝人也嘗以母病與弟立言專醫方得
其旨趣隋開皇初為秘書省正字後稱疾免隋魯州刺

史庫狄嶽苦風患手不得引弓諸醫莫能療權謂曰
但將弓箭向堞一鍼可以射矣鍼其肩隅一穴應時
即射權之療疾多此類也貞觀十七年權年一百三
歲太宗幸其家視其飲食訪以藥性因授朝散大夫
賜几杖衣服其年卒撰脉經鍼方明堂人形圖各一
卷弟立言武德中累遷太常丞御史大夫杜淹患風
毒發腫太宗令立言視之既而奏曰從今更十一月
午時必死果如其言時有尼明律年六十餘患心腹
鼓脹身體羸瘦已經二年立言診脉曰其腹內有蟲
當是誤食髮為之耳因令服雄黃須臾吐一蛇如人
手小指惟無眼燒之猶有髮氣其疾乃愈立言尋卒
撰本草音義七卷古今錄驗方五十卷

張文仲傳

張文仲洛州洛陽人也少與鄉人李虔縱京兆人韋
慈藏並以醫術知名文仲則天初為侍御醫時特進
蘇良嗣於殿庭因拜跪便絕倒則天令文仲慈藏隨
至宅候之文仲曰此因憂憤邪氣激也若痛衝脇則
劇難救自朝候之未及食時即苦衝脇絞痛文仲曰
若入心即不可療俄頃心痛不復下藥日旰而卒文
仲尤善療風疾其後則天令文仲集當時名醫共撰
療風氣諸方仍令麟臺監王方慶監其脩撰文仲奏
曰風有一百二十四種氣有八十種大體醫藥雖同
人性各異庸醫不達藥之性使冬夏失節因此殺人
佳脚氣頭風上氣常須服藥不絕自餘則隨其發動

臨時消息之但有風氣之人春末夏初及秋暮要得
通洩即不因劇於是撰四時常服及輕重大小諸方
十八首表上之文仲久視年終於尚藥奉御撰隨身
備急方三卷行於代虔縱官至侍御醫慈藏景龍中
光祿卿自則天中宗已後諸醫咸推文仲等三人為
首

孟詵傳

宋俠

孟詵汝州梁人也舉進士垂拱初累遷鳳閣舍人詵
少好方術嘗於鳳閣侍郎劉禕之家見其勅賜金謂
禕之曰此藥金也若燒火其上當有五色氣試之果
然則天聞而不悅因事出為台州司馬後累遷春官
侍郎睿宗在藩召充侍讀長安中為同州刺史加銀

青光祿大夫神龍初致仕歸伊陽之山第以藥餌為
事詵年雖晚暮志力如壯嘗謂所親曰若能保身養
性者常須善言莫離口良藥莫離手睿宗即位召赴
京師將加任用固辭衰老景雲二年優詔賜物一百
段又令每歲春秋二時特給羊酒糜粥開元初河南
尹畢構以詵有古人之風改其所居為子平里尋卒
年九十三詵所居官好勾剝為政雖繁而理撰家祭
禮各一卷喪服要二卷補養方必效方各三卷時則
有宋俠者洺州清漳人北齊東平王文學孝王之子
也亦以醫術著名官至朝散大夫藥藏監撰經心錄
十卷行於世

醫史卷之四終

醫史卷之五

浚儀李濂輯

宋史六人

龐安時傳

龐安時字安常蘄州蘄水人兒時能讀書過目輒記父世醫也授以脉訣安時曰是不足為也獨取黃帝扁鵲之脉書治之未久已能通其說時出新意辯詰不可屈父大驚時年猶未冠已而病疇乃益讀靈樞太素甲乙諸秘書凡經傳百家之涉其道者靡不通貫嘗曰世所謂醫書予皆見之惟扁鵲之言深矣蓋所謂難經者扁鵲寓術於其書而言之不詳意者使後人自求之歟予之術蓋出於此以之視淺深決死